

Zakon
o izmjenama i dopunama
Zakona o organizaciji penzijskog i invalidnog osiguranja FBiH

Član 5. Stav 2. Zakona o organizaciji penzijskog i invalidnog osiguranja FBiH, Službene novine br.49/00, mijenja se i glasi:

„ Upravni odbor sastoji se od 11 članova.

Članove Upravnog odbora bira Vlada FBiH, i to:

- 4 člana na prijedlog nadležnog ministra;
- 1 člana na prijedlog Udruženja penzionera;
- 3 člana na prijedlog Udruženja poslodavaca FBiH;
- 3 člana na prijedlog Saveza samostalnih sindikata BiH“.

Objasnenje

Konvencija 102. Međunarodne organizacije rada, o najnižim standardima socijalne sigurnosti u članu 72., predviđa učešće predstavnika poslodavaca i sindikata u vanbudžetskim organima koji imaju stvarnu moć odlučivanja, te ostavlja prostor nacionalnom zakonodavstvu za regulaciju ovog pitanja.

Sve države regiona su ovo pitanje regulisale, te već godinama delegiraju svoje predstavnike poslodavaca i sindikata u Zavod za penzijsko i invalidno osiguranje, kao naprimjer Hrvatska, Crna Gora, Srbija, Makedonija i sl.

Upravni odbor Fonda za penzijsko i invalidsko osiguranje zaposlenih Srbije od ukupno 15 članova, broji 10 članova koje delegiraju poslodavci i sindikat, dok Nadzorni odbor iste institucije također predviđa učešće predstavnika poslodavaca i sindikata, u nešto manjem broju.

Ističemo da čak i Republika Srpska u Fondu penzijskog i invalidnog osiguranja ima predstavnike Unije poslodavaca RS-a.

Osim država regiona ista situacija je i sa drugim državama u Evropi. Nadzorni odbor Institucije za socijalno osiguranje u Poljskoj sastoji se od 10 članova, od kojih predviđa 6 članova za predstavnike poslodavaca i sindikata.

Prema navedenim podacima o broju predstavnika poslodavaca i sindikata, vidimo da su sve države odlučile postupiti prema Konvenciji 102. o najnižim standardima socijalne sigurnosti te ispoštovati njene odredbe, obzirom da u svim državama predstavnici poslodavaca i sindikata su članovi organa vanbudžetskih institucija koje donose odluke i imaju stvarnu moć odlučivanja.

Jedan od zaključaka Odbora za socijalnu sigurnost na 89. sjednici Međunarodne konferencije rada, koja je održana u junu 2001. godine, bio je da se socijalnim partnerima treba dodijeliti važna uloga. Ovo je još jedan razlog za insistiranje na važnijoj ulozi socijalnih partnera te

pozicijama u organima koji donose odluke, a ne samo savjetodavnim tijelima kako je to kod nas predviđeno.

Na osnovu prethodno navedenog, mišljenja smo da je krajnje vrijeme da se pitanje delegiranja predstavnika poslodavaca i sindikata u organe vanbudžetskih institucija zakonoski reguliše i u Federaciji BiH, kako ne bismo bili jedini u okruženju, a i šire, koji takvo jedno važno pitanje nismo još uvijek regulisali.

Usvajanjem predloženih izmjena naše zakonodavstvo bi se usaglasilo sa odredbama Konvencije ILO broj:102. koju je naša država ratifikovala, i koja je time postala sastavni dio našeg pravnog sistema i to na način da ima jaču pravnu snagu od domicilnog zakonodavstva.